

# INTENSJONSAVTALE FOR SAMANSLÅING AV EIDFJORD KOMMUNE, GRANVIN HERAD, ULLENSVANG HERAD OG ULVIK HERAD

---

I samband med den pågåande kommunereforma i Noreg tek Eidfjord kommune, Granvin herad, Ullensvang herad og Ulvik herad sikte på å slå seg saman til ein kommune frå 1. januar 2020. Det er dei fire kommune- og heradsstyra som vedtek om kommunane skal slå seg saman eller ikkje.

I ein ny kommune vil det vera det nye kommunestyret som har avgjerdsmynde. Sjølv om dei noverande kommune- og heradsstyra ikkje juridisk kan binda eit nytt kommunestyre, har ein likevel vorte samde om ei rekkje intensjonar for ein ny kommune og som er tatt inn i dette dokumentet.

## 1. Mål for den nye kommunen

Kommunane Eidfjord, Granvin, Ullensvang og Ulvik ynskjer i saman å skapa ein ny, livskraftig og attraktiv kommune i Hardanger.

Den nye kommunen skal sikra og vidareutvikla kvalitet i tenestene til innbyggjarane og vera ein god kommune å bu og veksa opp i.

Målet med kommunesamanslåinga er å sikra innbyggjarane i dei fire kommunane gode desentraliserte tenester i framtida.

## 2. Kvifor ein ny kommune?

Kommunane Eidfjord, Granvin, Ullensvang og Ulvik er i dag kommunar med relativt lågt folketal og som er sårbare både når det gjeld tenesteutøving og inntektssituasjon. Ei samanslåing av dei fire kommunane vil gje den nye kommunen god økonomisk soliditet og såleis sikre at det også i framtida vert ytt gode tenester til innbyggjarane.

Ein ny og større kommune vil betre kunne leggja til rette for god og offensiv nærings- og samfunnsutvikling gjennom mellom anna meir koordinert arealplanlegging på tvers av dagens kommunegrensar.

Ein ny kommune vil mogleggjera større og sterkare fagmiljø, meir stabil rekruttering av relevant fagpersonell med god kompetanse og gjera tenesteytinga til innbyggjarane mindre sårbar.

Ein større kommune vil kunna gje meir effektiv administrasjon og tenesteproduksjon, kor vinsten skal nyttast til å gje betre tenester til innbyggjarane.

### **3. Prinsipp ved samanslåing**

Samanslåingsprosessen skal vera prega av likeverd, rausheit og forståing av kvarandre sin ståstad.

Den nye kommunen skal utviklast og driftast med utgangspunkt i dei tidlegare kommunane sine fortrinn og sterke sider, men og ut frå dei utfordringar dei har.

Den nye kommunen skal organiserast slik at han kan møte framtida sine utfordringar og krav til tenesteutøving til innbyggjarane.

Tilsette i dei fire kommunane skal ikkje bli sagt opp som følgje av prosessen. Eventuelle overtalige skal få tilbod om nye oppgåver i den nye kommunen. Den administrative omorganiseringa skal skje i nært samarbeid med dei tilsette og tillitsvalde. Den nye kommunen skal vera ein attraktiv og utviklande arbeidsplass for dei tilsette.

Den nye kommunen skal vidareutvikla lokalsamfunna i dei tidlegare kommunane i høve til bustadområde og attraktive bumiljø.

I den nye kommunen skal satsinga på framtidige arbeidsplassar og næringsutvikling på tvers av gamle kommunegrenser stå sentralt.

### **4. Kommunenamn, administrasjonssenter og kommunevåpen**

Namnet på den nye kommunen vert Hardanger/Ullensvang/Hardangerfjord kommune/herad.

Administrasjonssenteret i den nye kommunen skal vera i Eidfjord. Administrasjonssenteret skal tena heile den nye kommunen.

Kommunevåpenet skal ta utgangspunkt i åttebladrosa.

### **5. Lokaldemokrati**

Det skal sikrast at den nye kommunen har god demokratisk styring og representasjon.

Kommunestyret i den nye kommunen skal ha 25 representantar og formannskapet 9 representantar.

Ytterlegare politisk organisering vert opp til det nye kommunestyret å avgjera.

### **6. Tenestetilbodet**

Den nye kommunen skal yta gode og kostnadseffektive tenester til innbyggjarane sine. Det vert lagt opp til sterk satsing på å utvikla digitale tenester til bruk for innbyggjarane i den nye kommunen. I ein overgangsperiode vil det kunne vera behov for innbyggjarrettleiing og/eller kommunale treffpunkt i dei noverande kommunane.

Følgjande utgangspunkt ligg til grunn for det framtidige tenestetilbodet:

### **6.1. Administrasjonssenter**

Administrasjonssenteret skal innehalda kontor til ordførar, rådmann med stab og alle andre tenestefunksjonar som naturleg høyrer til i sentraladministrasjon i ein kommune.

Det skal sikrast god og tenleg etterbruk av lokala til sentraladministrasjonen i Granvin og Ulvik, som til dømes næringsbygg eller bustadar.

Heradshuset i Kinsarvik skal nyttast til anna kommunal tenesteyting, sjå punkt 6.5 og 6.6.

Den nærare administrative organiseringa av den nye kommunen vil bli fastlagt i løpet av samanslåingsprosessen.

### **6.2. Skular**

Barneskuletilbodet skal oppretthaldast i Eidfjord, Granvin, Ulvik og Ullensvang.

Ungdomsskulane i Eidfjord, Granvin og Ulvik skal slåast saman til ein felles ungdomsskule, lokalisert i Granvin.

Ungdomsskuletilbodet skal oppretthaldast i Ullensvang.

### **6.3. Barnehagar**

Barnehagetilbodet skal oppretthaldast i dei noverande kommunane.

### **6.4. Helse- og omsorg**

I den nye kommunen skal heimebaserte tenester vera eit satsingsområde.

Det skal byggjast opp eit hovudsenter for tenester innan helse og omsorg for heile kommunen i Ulvik. Spesialistfunksjoner skal samlokalisert her for å sikra sterke fagmiljø med relevant kompetanse. Det skal framleis vera eit godt tilbod om legeteneste i Eidfjord, Granvin, Lofthus og Utne. Tenester som eventuelt krev serleg nærleik til brukarane kan ytast i dei noverande kommunane dersom dette er naudsynt og ynskjeleg.

I samband med hovudsenteret i Ulvik skal det byggjast ein ny sjukeheim. Den nye kommunen vil då ha fire sjukeheimar; ein i Eidfjord, ein på Utne, ein i Kinsarvik og ein i Ulvik. Det skal sikrast god og tenleg etterbruk av lokala til sjukeheimen i Granvin.

Eit senter for teneste for funksjonshemma i den nye kommunen skal utviklast i Kinsarvik.

Dersom ansvaret for tannhelsetenesta vert lagt til kommunane i framtida, skal det byggjast opp ei slik teneste i den nye kommunen integrert saman med hovudsenteret for tenester innan helse og omsorg.

Den nye kommunen skal samlast innunder Helse Bergen.

## **6.5. NAV**

NAV skal vere lokalisert i heradshuset i Kinsarvik. I den nye kommunen skal NAV sine tenester organiserast slik at dei lett kan nåast av innbyggjarane, og slik at NAV kan ha den nære kontakten med lokalt næringsliv som er naudsynt.

## **6.6. Tekniske tenester**

Eit kontor for tekniske tenester, landbruk og skogbruk skal vere lokalisert i heradshuset i Kinsarvik. Tekniske tenester må organiserast slik at tenester som krev nærleik til brukarane er lett tilgjengelege for innbyggjarane i heile kommunen.

## **6.7. Kultur og fritid**

Den nye kommunen skal ha kulturskule og bibliotek som lett kan nåast av innbyggjarane. Frivillig sektor og andre kulturinstitusjonar skal ha gode rammer.

## **6.8. Innvandrarsenter**

Kompetansesenter for flyktningar og asylsøklarar for heile den nye kommunen skal ligge i Kinsarvik.

## **7. Fjellforvalting**

Bruksrettar i statsallmenningar er regulerte i fjellova. Ei kommunesamanslåing vil ikkje føra til reelle endringar for innbyggjarane samanlikna med dagens situasjon.

Den nye kommunen vil få tre ulike statsallmenningar innan sine grenser (Eidfjord statsallmenning, Ullensvang statsallmenning og Ulvik statsallmenning). Dei fire kommunestyra ynskjer at det skal vera eit eige fjellstyre for kvar av statsallmenningane også i den nye kommunen.

## **8. Næringsliv**

Den nye kommunen skal satsa på samfunns- og næringsutvikling for å fremja verdiskaping og vekst i livskraftige lokalsamfunn.

For dei noverande kommunane er det ein føresetnad at den nye kommunen aukar satsinga på næring, reiseliv og landbruk.

For den nye kommunen er det avgjerande at skulen på Hjeltnes består som ein regional utdanningsinstitusjon, og at Hjeltnes også i framtida vil utgjera ein viktig kompetansearbeidsplass i

kommunen. Alle dei fire noverande kommunane forpliktar seg til å jobba aktivt for dette i tida fram til den nye kommunen trer i kraft.

I den nye kommunen er Sysendalen eit prioritert område for nærings- og reiseliv, gjennom utvikling av tilbod som gjev heilårs hytte- og reiselivsturisme.

Den nye kommune skal arbeida for gode rammevilkår for Moelven Granvin bruk som hjørnesteinsbedrift.

Statlege arbeidsplassar, som til dømes Statens Kartverk Ullensvang, Hardanger tingrett og NIBIO, vil vere viktig for den nye kommunen. Etablering av ytterlegare statlege arbeidsplassar skal vere eit satsingsområde i den nye kommunen.

Den nye kommunen skal vera ein aktiv pådrivar for å sikra at E 134 og Rv 7 vert sikre heilårsvegar, og Fv 7, Fv 550 og Fv 572 viktige fylkesvegar. Rv 13 vil vere viktig for den interne kommunikasjonen i den nye kommunen, og utbetring av vegen skal vere høgt prioritert.

Den nye kommunen skal vera ein pådrivar for vidare fiberutbygging.

## **9. Særskilde tema**

Den nye kommunen skal ha eigedomsskatt på verk og bruk slik dei fire kommunane har i dag. Det vert på noverande tidspunkt ikkje lagt opp til eigedomsskatt utover på verk og bruk, men den endelege avgjerda om eigedomsskatt vil liggja til kommunestyret i den nye kommunen.

Den nye kommunen skal vere ein aktiv pådrivar for å betre ferjetilbodet på strekningane Utne-Kinsarvik-Kvandal.

Både noverande og framtidige kommunestyre skal arbeida for å få i stand eit godt og tilfredsstillande kollektivtilbod både innanfor den nye kommunen og til og frå den nye kommunen.

Den nye kommunen skal arbeida for å få til kompensasjonsordningar for bompengar når innbyggjarane må kryssa Hardangerbrua eller ta ferje for å ta imot nødvendige kommunale tenester.

Det skal sikrast at eksisterande kommunale bygningar som i framtida ikkje vert nytta til kommunal tenesteyting får ein etterbruk til gagn for lokalsamfunnet der dei er plasserte.

Dei fire kommunane sitt planverk skal gjelda inntil nytt, felles planverk er vedteke av den nye kommunen.

Beredskap og tryggleik er viktig for innbyggjarane i dei fire kommunane. Den nye kommunen skal prioritera dette arbeidet også i framtida, inkludert beredskap i høgfjellet.

Fram til den nye kommunen er etablert skal dei fire kommunane informera kvarandre før tilsetjing i leiar- og spesialiststillingar, og vurdera samarbeid der det er mogleg.

Innbyggjarane og tilsette i alle kommunane skal få god informasjon undervegs i prosessen fram til den nye kommunen er etablert.

## **10. Prioriterte investeringsprosjekt i den nye kommunen**

Forutan pågåande prosjekt som er fullfinansierte i balansert budsjett/økonomiplan, skal den nye kommunen prioritera investeringar til eit hovudsenter for tenester innan helse og omsorg for heile kommunen i Ulvik og til felles ungdomsskule i Granvin.

Fram til den nye kommunen er etablert vil arbeidet med planlegginga av eit helse og omsorgssenter i Ulvik bli ivaretatt og finansiert av Ulvik herad. Om det skulle vere økonomisk naudsynt, skal fylgjande inntekter og midlar i den nye kommunen øyremerkast dette prosjektet og kan ikkje nyttast til andre føremål før prosjektet er gjennomført:

- Inneståande på Ulvik herad sitt disposisjonsfond, investeringsfond og eventuelle andre ubundne fondsmidlar per 1. januar 2020.
- Forskotterte midlar frå vegutbetring av Fv 572.
- Eigedomsskatteinntekter frå eventuelle framtidige kraftutbyggingar.

Fram til ny kommune er etablert vil planlegginga av ny ungdomsskule i Granvin bli ivareteken og finansiert av Granvin herad. Det skal gjennomførast ein vurdering av Elektrofagskulen som nytt mogleg ungdomsskulebygg.

I tida fram til 1. januar 2020 skal dei fire kommunane også orientera kvarandre om aktuelle investeringsprosjekt med ei kostnadsramme over NOK 1 000 000 før eventuelt vedtak vert fatta.

Dersom det vidare arbeidet med kommunereform skulle resultera i at Ullensvang herad vert delt og ein del vert lagt til ein mogleg framtidig kommune beståande av Eidfjord, Granvin og Ulvik, skal denne intensjonsavtalen leggest til grunn så langt den passar.

11. februar 2016

---

Anved Johan Tveit (SP)  
Ordførar Eidfjord kommune

---

Ingebjørg Winjum (V)  
Ordførar Granvin herad

---

Solfrid Borge (SP)  
Ordførar Ullensvang herad

---

Hans Petter Thorbjørnsen (A)  
Ordførar Ulvik herad